

Տ. ԱՐԱՐԱՏ ՔԶՆ. ՊՈՂՈՍՅԱՆ

«Վաչե եւ Թամար Մանուկյան» մատենադարանի տնօրեն
Մայր Աթոռի հրատարակչական բաժնի տնօրեն, ԳՀԾ, ՍՎԴ

Ս. ԷՋՄԻԱԾՆԻ ՓԱՂՏՆԻ ԺՈՂՈՎԸ ԵՒ ՀԱԿՈՒ Դ. ՃՈՒՂԱՅԵՑԻ ԿԱԹՈՂԻԿՈՍԻ ԲԱՆԱԳԱՅՈՒԹՅՈՒՆԸ ՀԱՅ ԱԶԱՏԱԳՐԱԿԱՆ ՊԱՅՔԱՐԻ ՈՒՍՈՒՄՆԱՍԻՐՄԱՆ ՀԱՄԱՏԵՔԱՏՈՒՄ

Մոտմ

Նախորդ Դ. Զուղայեցի կաթողիկոսի (1655–1680 թթ.) գահակալության տարիներին նրա անմիջական նախաձեռնությամբ ազատագրական պայքարի ուղղությամբ տարվող աշխատանքների համար կարեւոր է անդրադառնալ Ս. Էջմիածնի 1677/1678 թ. գաղտնի ժողովին եւ դրան առնչվող մի շարք հարցերի: Նշված ժողովին նախորդել է կաթողիկոսի՝ օտար միջավայրում դիվանագիտական կապերի հաստատման, հայ ազատագրական պայքարի գաղափարական միասնության նախապատրաստական աշխատանքը, որին մենք անդրադարձել ենք մեր նախորդ հրապարակումով¹:

Այս ժողովը հանգուցային եւ ուղենշային դերակատարություն ունեցավ հայ ազատագրական պայքարի գաղափարական կողմնորոշման² հարցում, ինչպես նաեւ գործնական հող նախապատրաստեց հաջորդող գործիչների առավել իրատեսական ծրագրերի մշակման, գործողությունների համար: Այս ժողովի մասին տեղեկությունները սերտորեն կապված են Խսրայել Օրու գործունեության հետ: Բուն ժողովից որեւէ փաստաթուղթ չի պահպանվել, իսկ այն տեղեկությունները, որոնք պահպանվել եւ հասել են մեզ, ժողովի թվականից շուրջ 20 տարվա վաղեմության են, թեեւ դրանցում առկա տվյալներից որոշները հիմնավորվում են հարակից այլ տեղեկություններով եւ «զուրկ չեն հիմքից»³:

¹ Տե՛ս Տ. ԱՐԱՐԱՏ ՔԶՆ. ՊՈՂՈՍՅԱՆ, Հախոր Դ. Զուղայեցի կաթողիկոսը եւ հայ ազատագրական պայքարը 1655–1674 թթ., «Էջմիածին», 2020, է., էջ 24–38, «Էջմիածին», 2020, Ը., էջ 45–60:

² Հստ Հրաչիկ Միրզոյանի՝ «XVII դ. կեսերից հայ-ռուսական առևտրա-տնտեսական ու մշակութային կապերի ուժեղացմանը զուգընթաց աստիճանաբար սաղմնավորվում էր հայ ժողովրդի ազատագրության ռուսական կողմնորոշումը» (տե՛ս Հ. ՄԻՐԶՈՅԱՆ, XVII դարի հայ փրկսփայական մտքի քննական վերլուծություն, Երեւան, 1983, էջ 154):

³ Ա. ՀՈՎՀԱՆՆԻՍՅԱՆ, Դրվագներ հայ ազատագրական մտքի պատմության, գիրք երկրորդ, Երեւան, 1959, էջ 207:

Պատմագիտության մեջ այս ժողովի շուրջ առկա մասնագիտական գնահատականները տարբեր են, իսկ երբեմն էլ՝ հակասական: Այդ մասին վկայում է խնդիրը քննության առած Աշոտ Հովհաննիսյանը, ըստ որի՝ Հակոբ կաթողիկոսի մահվանից հետո արդեն իսկ «...հայ կյանքում շարունակվում էին էջմիածնի խորհրդաժողովի շուրջն արծարծված թեր եւ դեմ կարծիքների բախումները»⁴:

Ժողովի արդյունքների կարեւորությունը հայ ազատագրական պայքարի տվյալ փուլում հասկանալու համար կարեւոր է անդրադառնալ խորհրդաժողովի տեղին, թվականին, մասնակիցներին, բանագնացներին եւ մի շարք կարեւոր այլ հարցերի, որոնք կարող են լույս սփռել ԺԷ. դարավերջի հայ ազատագրական պայքարի պատմության ուսումնասիրությանը:

Ժողովի տեղի խնդիրը

Ընդհանրապես հայ ազատագրական պայքարի ուսումնասիրությանը ցույց է տվել, որ Հայ Եկեղեցին, ի դեմս եկեղեցականների, եղել է հայոց պետականության անկախության վերականգնման եւ պահպանման համար մղվող պայքարի առաջամարտիկը: Այս իրողությամբ է պայմանավորված, որ հայ ազատագրական պայքարի միջնադարյան ողջ պատմությունը սերտորեն առնչվում է եկեղեցական գործիչների գործունեությանը, որոնց գործողությունները հիմնականում համակարգում էին Հայոց կաթողիկոսները: Իսկ վերջիններս, կապված Հայրապետական Աթոռի տեղափոխություններով, հաճախ այդ պայքարը համակարգում, առաջնորդում էին տարբեր կենտրոններից:

Հայ ազատագրական պայքարի համար թերեւս նոր փուլ էր, երբ Հայրապետական Աթոռը 1441 թ. Սսից վերահաստատվեց Վաղարշապատում: Այստեղ վերահաստատման պատմական իրողությունը մենք չենք դիտարկում որպես լոկ եկեղեցապատմական իրադարձություն, այլ Աթոռը Ս. էջմիածնում վերահաստատելը կարեւորում ենք նախևառաջ ազգահավաքության⁵ եւ հավատքի ու դավանանքի անաղարտ պահելու

⁴ Ա. Հովհաննիսյան, Դրվագներ..., էջ 220:

⁵ Տե՛ս Թովմա Մետոքեսի, Պատմագրություն, աշխ.՝ Լեւոն Խաչիկեանի, Երեւան, 1999, էջ 288. ՍՏ. ՄԵԼԻՔ-ԲԱՇԽԵԱՆ, Հայոց պատմութեան աղբիւրագիտութիւն. հնագոյն ժամանակներից մինչեւ XVIII դարի վերջը, Երրորդ հրատ., Երեւան, 1996, էջ 238. Թովմա Մետոքեսի, Պատմագրական երկեր, թարգմ., առաջաբ. եւ ծանօթ.՝ Արշակ Մաղոյեանի, Երեւան, 2003, էջ Ժ.—ԺԱ.:

նշանակությունն արժեւորելու տեսանկյունից: Թեեւ կաթողիկոսական գահը Ժ.—ԺԵ. դարերում անընդհատ տեղափոխվել է, սակայն Ս. Էջմիածինը շարունակել է մնալ հայ ժողովրդի համար որպէս ներշնչման աղբյուր եւ հայկականության խորհրդանիշ: Հատկապէս այդ մասին է փաստում Մայր Տաճարին նվիրված ողջ միջնադարյան գրականությունը⁶:

Այս տեսանկյունից ԺԶ.—ԺԷ. դարերի հայ ազատագրական պայքարի պատմությունն ուսումնասիրելիս անհնար է շրջանցել Ս. Էջմիածինը եւ նրա գահակալներին: Հատկապէս ԺԷ. դարում Ս. Էջմիածնի Հայոց կաթողիկոսների եւ ընդհանրապէս եկեղեցականների աշխույժ դերակատարությունը եւ մասնակցությունը հայ ազատագրական պայքարի կազմակերպման գործում առավել ցայտուն է, որն ամենեւին էլ պատահական չէ եւ բացատրվում է տվյալ դարաշրջանի մշակութային վերազարթոնքով⁷, որի կարկառուն ներկայացուցիչներից է նաեւ «բարենորոգչական դպրոցի աշակերտ»⁸ իր ժամանակակիցների բարձր գնահատանքին արժանացած⁹ Հակոբ Դ. Զուղայեցի կաթողիկոսը¹⁰: Վերջինիս հայրենի պետականության վերականգնման համար հայրենիքում եւ նրա սահմաններից դուրս մղվող պայքարը կազմակերպելու գործունեությամբ էլ պայմանավորված¹¹ ԺԷ. դարի կեսից սկսվում է հայ ժողովրդի պատմության նոր շրջանը¹¹:

Հատկանշական է, որ ԺԷ. դարում, հատկապէս դարի կեսից սկսած, հենց Ս. Էջմիածնում էին ստեղծված այնպիսի բարենպաստ պայմաններ, որոնք հնարավորություն էին ընձեռում Հակոբ կաթողիկոսին զբաղվելու ոչ միայն ներեկեղեցական խնդիրները հարթելով, այլեւ զարկ տալու մշակութային կյանքին եւ նախաձեռնելու Հայաստանի՝ օտարի լծից ազատագրվելու փորձ: Այդ փորձն ամենեւին էլ պարզ պատկերացնելիք չէ,

⁶ Տե՛ս Սուրբ Էջմիածինը հայ մատենագրությունում (V—XIX դդ.), աշխ.՝ Հ. Քյոսեյանի եւ Վ. Դեւրիկյանի, Ս. Էջմիածին, 2003:

⁷ Պատմաբան Վ. Դիլոյանը ԺԷ. դարի կրթալուսավորչական շարժման ներկայացուցիչների գործունեությամբ է պայմանավորում հայ ժողովրդի ազգային ինքնագիտակցության բարձրացումը եւ «հուսալի դաշնակիցներ որոնելու» գործընթացը. (տե՛ս Հայոց պատմություն, հտ. III, Նոր ժամանակաշրջան (XVII դարի երկրորդ կես — 1918 թ.), գիրք առաջին (XVII դարի երկրորդ կես — XIX դարի վերջ), Երեւան, 2010, էջ 17:

⁸ Մ. ԽՈՍՏԻԿԵԱՆ, Վերածնունդի տարիներ. ԺԷ. դարում հայոց վերանորոգչի կաթողիկոսները. Յակոբ կաթողիկոս Զուղայեցի («Արարատ» ամսագիր, 1902, Թ.—Ժ., էջ 272:

⁹ Տե՛ս Վ. ԴԻՆՈՅԱՆ, Հայոց պատմության պարբերացման մի քանի հարցերի շուրջ, «Բանբեր Երեւանի համալսարանի», 1993, թիվ 3, էջ 6—7:

¹⁰ Տե՛ս ԼԵՌՈՆ ՍՐԿ. ԱՂՈՍՅԱՆ, Հակոբ Դ. Զուղայեցի կաթողիկոսը եւ հայ ազատագրական շարժումը, ավարտաճառ, Ս. Էջմիածին, էջ 34 (անտիպ):

¹¹ Տե՛ս Ա. ՄԵԼՔՈՆՅԱՆ, Հայոց պատմության նոր պարբերացման խնդիրները, «Հայագիտություն հարցեր», 2017, թիվ 3, էջ 202:

այն ենթադրում էր առաջին հերթին հայ հասարակության կարող ուժերի համախմբում, հասարակության ազատ ապրելու ինքնագիտակցության եւ լուսավորության բարձրացում, օտար միջավայրում դիվանագիտական կապերի հաստատում եւ շահագրգիռ ուժերի ներգրավում, իսկ այդ ամենը տարիների շարունակական տքնաջան աշխատանք էր պահանջում: Եւ այս ամենը Ս. Էջմիածինն իրականացնում էր պարսկական եւ թուրքական ուժերի եւ գործակալական խիստ հսկողության ներքո:

Ժողովի թվականի խնդիրը

Հակոբ կաթողիկոսի գործունեությունը հայ ազատագրական պայքարի կազմակերպման ուղղությամբ կրում էր շարունակական բնույթ, եւ 1670-ական թվականների վերջի այս նախաձեռնությունը նրա ձեռնարկումների հերթական փուլն էր: Այս ժողովի գումարման թվականի շուրջ կան տարակարծություններ: Խնդիրը կարելի էր շրջանցել՝ համաձայնելով մասնագիտական գրականության մեջ առկա այս կամ այն թվականին: Սակայն, մեր կարծիքով, ժողովի թվականի խնդրին անդրադառնալը կարող է լուծել ավելի խորքային հարցեր: Այսօր հայ պատմագիտության կողմից ընդունելություն գտած թվականը համարվում է 1677-ը, սակայն շրջանառության մեջ է նաեւ 1678 թվականը: Առաջին հայացքից էական նշանակություն չունեցող թվականի ճշգրտումը կարող է լույս սփռել պարսկական եւ թուրքական տիրապետության ներքո հեծծող բախտակից ժողովուրդների, հատկապես վրաց¹² ժողովրդի հետ համատեղ ճակատ կազմելու եւ հնարավոր համագործակցության պատմության վրա:

Ժողովի մասին տեղեկությունները մեզ են հասել Իսրայել Օրուն վերաբերող փաստաթղթերի միջոցով¹³: Եւ այսօր շատ հարցեր, կապված սույն ժողովի հետ, հենց լուսաբանվում եւ ներկայացվում են այդ փաստաթղթերի հաղորդած տեղեկությունների հիման վրա: Ուստի դրանցում առկա տեղեկությունների ճշգրտումն ու համադրումն այլ աղբյուրների հետ կարող է լույս սփռել հայ ազատագրական պայքարի կազմակերպման որոշ հարցերի վրա:

¹² Տե՛ս Ա. ՀՈՎՀԱՆՆԻՍՅԱՆ, *Ջաքարիա Ագուլեցին եւ իր ժամանակը, հրատ. պատրաստ. Վարուժան Պողոսյանը, Երեւան, 2017, էջ 102:*

¹³ Տե՛ս Գ. Ա. ԷՅՕՎ, *Сношения Петра Великого с армянским народом. Документы извлеченные из московского главного и С.-Петербургского архивов министерства иностранных дел, австрийского придворного и государственного архива, королевско-баварского тайного государственного архива, СПб, 1898:*

Օրմանյան սրբազանը եւ այլ հեղինակներ աներկբա ընդունում են ժողովի 1678 թ. տեղի ունեցած լինելու հանգամանքը¹⁴։ Իսկ որոշ ուսումնասիրողներ¹⁵, հիմք ընդունելով մի շարք աղբյուրների հաղորդած տեղեկությունները, պնդում են, որ ժողովը տեղի է ունեցել 1677-ին։

Մեր կարծիքով, այս թվականի ճշգրտումը մեզ հնարավորություն կընձեռի առավել հստակ պատկերացնելու բանակցությունների եւ գործողությունների այն շրջանակը, որը նախատեսված էր այս փուլում։ Հստորի էլ կարող ենք հետեւություններ անել, թե վերջին երկու տասնամյակում ինչ գաղափարական եզրահանգումներ եւ գործնական քայլերի ակնկալիքներ ուներ Հակոբ կաթողիկոսը։

Ժողովի՝ 1678 թ. տեղի ունեցած լինելու կողմնակիցների համար հիմք են ծառայել հայ մեկիքների ստորագրած գրությունը («Դարձեալ թվին ՌՃԻԷ-ին [=1127] (+551=1678.— նշումը մերն է) մենք ժողովեցանք միատեղ»¹⁶) եւ Օրու զեկուցագիրը («...тому де 23¹⁷ года, в Ревани городе армянской патриархъ, а с ним 12 человек старшины их армянской,исоветовали»¹⁸), որոնցում հստակ արձանագրված է, որ ժողովը տեղի է ունեցել նշված թվականին։ Իսկ ժողովը 1677 թ. տեղի ունեցած լինելու կողմնակից ուսումնասիրողների համար հիմք են ընդունվում Զաքարիա սարկավազի¹⁹, Զաքարիա Ագուլեցու²⁰ եւ Սիմեոն րեւանցու²¹ հաղորդած տեղեկությունները։ Ա. Հովհաննիսյանը, համադրելով այս տեղեկությունները, հանգում է այն

¹⁴ ՏՆԱ ՄԱՎԱԲԻԱ ԱՐՔ. ՕՐՄԱՆԵԱՆ, Ազգապատում, հտ. Բ., Ս. էջմիածին, 2001, էջ 3026. Ա. ՀՈՎՀԱՆՆԻՍՅԱՆ, Իսրայել Օրին եւ հայ ազատագրական գաղափարը, Երեւան, 2016, էջ 147. ԼԵՈ, Խոջայական կապիտալը եւ նրա քաղաքական-հասարակական դերը հայերի մեջ, Երեւան, 1934, էջ 120. ԼԵՈ, Երկերի ժողովածու, հտ. III, Երեւան, 1969, էջ 337։ ԼԵՈ, Երկերի ժողովածու, հտ. V, Երեւան, 1986, էջ 261. Յ. ՔԻՐԻՏԵԱՆ, Նիւթեր Յակոբ Զուլալեցի կաթողիկոսի կենսագրութեան համար (1655–1680), «Հասկ», 1952, մարտ-ապրիլ, էջ 88. Ա. ԱՐԱՎԱՍՏԱՆ, Վարդան Կաֆայեցու շափածո տոմարը, «էջմիածին», 1954, թ., էջ 28–29։

¹⁵ ՏՆԱ Ա. ՀՈՎՀԱՆՆԻՍՅԱՆ, Դրվագներ..., էջ 207–208. Հայոց պատմություն..., էջ 17. Պ. ՀՈՎՀԱՆՆԻՍՅԱՆ, Պատմագիտական ուսումնասիրություններ, Նյութերի ժողովածու, Երեւան — Ս. էջմիածին, 2017, էջ 30. Հ. ՄԻՐՋՈՅԱՆ, XVII դարի..., էջ 40. К. АЙВАЗЯН, История отношений русской и армянской церковей в средние века, Ереван, 1989, էջ 151։

¹⁶ ՏՆԱ Գ. Ա. ՅՅՕՎ, նշ. աշխ., էջ 17։

¹⁷ Զեկուցագիրը գրված է 1701 թվականին։

¹⁸ ՏՆԱ Գ. Ա. ՅՅՕՎ, նշ. աշխ., էջ 92։

¹⁹ ՏՆԱ ԶԱՔԱՐԻԱ ՔԱՆԱՔԵՆՅԻ, Պատմութիւն, աշխատ.՝ Արմեն Վիրաբյանի, Երեւան, 2015, էջ 141։

²⁰ ՏՆԱ Ա. ՀՈՎՀԱՆՆԻՍՅԱՆ, Դրվագներ..., էջ 174–175. Հ. ՄԻՐՋՈՅԱՆ, Հովհաննես Մրքուզ Զուլալեցի, Երեւան, 2001, էջ 207. ԶԱՔԱՐԻԱ ԱԳՈՒԼԵՅԻ, Օրագրութիւն, Երեւան, 1938, էջ 128։

²¹ ՏՆԱ ՍԻՄԵՈՆ ԿԱՔՈՂԻԿՈՍ ԵՐԵՆԱՅԻ, Զամբո, թարգմ., առաջ. եւ ծանոթ.՝ Վ. Համբարձումյանի, Երեւան, 2003, էջ 113։

եզրակացություն, որ ժողովը պետք է տեղի ունեցած լինի 1677 թ., ուստի 1678 թ. «բոլոր պարագաներում էջմիածնի խորհրդաժողովի գումարման համար պիտի շտկելի համարենք»²², թեեւ նշենք, որ Հովհաննիսյանն այլ աշխատությունների մեջ ժողովի թվականը համարում է 1678 թ.²³:

Մեր կարծիքով՝ ուսումնասիրողները խնդրին պետք է մոտենան ոչ թե աղբյուրների հաղորդած տեղեկությունները հակադրելով, այլ համադրելով: Հատկանշական է, որ Ագուլեցին մեզ հետաքրքրող խնդրի շուրջ ունի երկու հիշատակություն. առաջինում, խոսելով Հակոբ կաթողիկոսի Յղնա եւ Ագուլիս կատարած այցերի մասին, գրում է. «Թվին ՌՃԻԶ յունիսի մէկ յԵրեւան.... անիցն փախաւ, գնաց Վ²⁴....»²⁵, իսկ երկրորդ անգամ հիշատակում է այն ժամանակը, երբ 1679 թ. դեկտեմբերի 15-ին Միքայել վարդապետը, որպէս էջմիածնի աթոռակալ եւ նվիրակ, այցելում է Ագուլիս. «Քանզի Յակոբ կաթողիկոսն այս բ ամ է, որ էջմիածնայ Սէֆիղուլի խանի ձեռացն փախաւ, գնաց Վրացտուն, Վրացտան վերայ գնաց Խորմացատուն»²⁶: Ինչպէս տեսնում ենք, առաջին հիշատակությունն անորոշ է եւ ոչինչ չասող, պարզ է մի բան, որ հունիսի մեկին կաթողիկոսը եղել է Երեւանում, միայն երկրորդ հիշատակության շնորհիվ է, որ հասկացվում է, թե կաթողիկոսը 1679 թ. դեկտեմբերի 15-ից առաջ երկու տարի բացակայել է Մայր Աթոռից եւ գտնվել Վրաստանում:

Զաքարիա Քանաքեռցին եւս հստակ ոչինչ չի հիշատակում: Ըստ պատմագրի՝ Հակոբ կաթողիկոսը «ձանձրացաւ ի բազում պարտատուացն»²⁷, ուստի խույս տալու նպատակով մեկնում է Վրաստան, որտեղ «աւուրս ինչ» մնալով՝ մեկնում է Կ. Պոլիս²⁸:

Հետաքրքրական տեղեկություններ է պարունակում Սիմեոն Երեւանցու «Զամբու» աշխատությունը, որտեղ հեղինակը, անդրադառ-

²² Ա. ՀՈՎՀԱՆՆԻՍՅԱՆ, Դրվագներ..., էջ 208:

²³ Տէս Ա. ՀՈՎՀԱՆՆԻՍՅԱՆ, Հայ-ուս օրիենտալիստի ծագման խնդիրը. պատմական-քննադատական ուսումնասիրություն, էջմիածին, 1921, էջ V. Ա. ՀՈՎՀԱՆՆԻՍՅԱՆ, Զաքարիա Ագուլեցին..., էջ 99:

²⁴ Ուսումնասիրողներն այս հիշատակության «Վ....»-ն հավանական են համարում, որ ընթերցվել է «Վրացտուն» (տես ԶԱՔԱՐԻԱ ԱԳՈՒԼԵՑԻ, Օրագրություն, Երեւան, 1938, էջ 128). Ա. ՀՈՎՀԱՆՆԻՍՅԱՆ, Դրվագներ..., էջ 207:

²⁵ ԶԱՔԱՐԻԱ ԱԳՈՒԼԵՑԻ, Օրագրություն, Երեւան, 1938, էջ 128:

²⁶ Անդ, էջ 145:

²⁷ Ըստ Զաքարիա Քանաքեռցու՝ Ոնոփրիոսը Ս. էջմիածնի անունով պարտքեր էր կուտակել, իսկ պարտատուները որպէս պարտապան ճանաչում էին կաթողիկոսին, ուստի նրանից էլ պահանջում էին իրենց հասանելիք պարտքը (տես ԶԱՔԱՐԻԱ ՔԱՆԱՔԵՐԵՑԻ, նշ. աշխ., էջ 141:

²⁸ Տէս անդ:

նալով Ամենայն Հայոց եւ Գանձասարի (իմա՝ Աղվանից) կաթողիկոսությունների հարաբերություններին, հիշատակում է Գանձասարի Սիմեոն կաթողիկոսի 1677 թ. մի գրությունը²⁹, ուղղված Հակոբ Զուղայեցի կաթողիկոսին՝ կնքված իր եւ մի քանի եպիսկոպոսների կողմից, որը եւ պահվում է Մայր Աթոռում³⁰: Ա. Հովհաննիսյանը, գնալով «Զամբռ»-ում հիշատակված գրության բնօրինակի հետքերով, այն հայտնաբերում է Երեւանի Մատենադարանում³¹, որի ուսումնասիրությունից պարզում է, որ երկու կաթողիկոսները հավանաբար հանդիպել են Վրաստանում³²: «Զամբռ»-ը հիշատակում է մի տեղեկություն եւս, որտեղից թեւ հստակ է, որ կաթողիկոսը 1678 թ. եղել է Վրաստանում, այնուամենայնիվ հստակ է, որ նույն թվականին «կաթողիկոսի միջոցով» Շուշավեր գյուղում այգի են նվիրել Ս. էջմիածնին³³: Հ. Քյուրտյանը, անդրադառնալով Առաքել Բոկոտնի գործունեությանը, առաջին անգամ հրապարակում է մի նամակ³⁴, որն Առաքելը գրել էր Հավատի տարածման ժողովի ղեկավարությանը: Նամակում, որը թվագրված է 1678-ի նոյեմբերի 12-ով, նշված է, որ արդեն 16 ամիս է՝ կաթողիկոսի հետ ճանապարհ են ելել եւ նպատակ են ունեցել Մոսկվայի վրայով այցելել Հռոմ, սակայն չի հաջողվել, եւ նրանք ետ են դարձել³⁵: Քյուրտյանը բավական խիստ քննության է առել սույն նամակի բովանդակության արժանահավատությունը³⁶, սակայն այստեղ մեզ հետաքրքրող տեղեկությունն այն է, որ նախաձեռնած ճանապարհորդությունը, ինչ-ինչ արգելքների հանդիպելով, ընդհատվել է: Ժողովի թվականի վերաբերյալ հստակություն չեն մտցնում նաեւ Միքայել Չամչյանի հաղորդած տեղեկությունները: Նա գրում է, որ կաթողիկոսը, Կ. Պոլսի եւ Երուսաղեմի Հայոց պատրիարքություններում տեղի ունեցող խառնակ իրավիճակից նեղված, որոշեց գնալ Կ. Պոլիս եւ հաշտեցնել հակառակորդ կողմերին³⁷:

²⁹ Ըստ «Զամբռ»-ի գրության՝ միջնադարում Գանձասարի կաթողիկոսությունում գոյություն է ունեցել «սխալ եւ կանոնից դուրս սովորություն», ըստ որի՝ կաթողիկոսի ազգականն իրեն կարող էր առաջադրել կաթողիկոսի թեկնածու՝ կաթողիկոսությունը նկատելով որպես «հայրենի ժառանգություն» (տե՛ս ՍԻՄԵՈՆ ԿԱԹՈՂԻԿՈՍ ԵՐԵՒԱՆՅԻ, Զամբռ, Երեւան, 2003, էջ 113):

³⁰ Տե՛ս անդ:

³¹ Տե՛ս Ա. ՀՈՎՀԱՆՆԻՍՅԱՆ, Դրվագներ..., էջ 209:

³² Տե՛ս անդ:

³³ Տե՛ս ՍԻՄԵՈՆ ԿԱԹՈՂԻԿՈՍ ԵՐԵՒԱՆՅԻ, նշ. աշխ., էջ 288:

³⁴ Տե՛ս Յ. ՔԻՐՏԵԱՆ, Յակոբ Կաթողիկոս Զուղայեցի, Անթիլիաս—Լիբանան, 1965, էջ 48—89:

³⁵ Տե՛ս Յ. ՔԻՐՏԵԱՆ, Յակոբ Կաթողիկոս..., էջ 48:

³⁶ Տե՛ս Յ. ՔԻՐՏԵԱՆ, Յակոբ Կաթողիկոս..., էջ 49—51:

³⁷ Տե՛ս ՄԻՔԱՅԷԼ ՉԱՄՉՅԱՆ, Հայոց պատմություն, հտ. Գ., Երեւան, 1984, էջ 718:

Իսկ գժտությունները Կ. Պոլսում եւ Երուսաղեմում սկսվել էին դեռեւս 1660-ականներին եւ 1670-ականներին շարունակվում էին: Ուստի դժվար է կռահել, թե, «կամեցաւ Յակոբ կաթողիկոս դարման ինչ մատուցանել այսմ ամենայնի»³⁸ ասելով, որ տարվա³⁹ դեպքերը «դարմանել»-ը նկատի ուներ: Ըստ Զամչյանի՝ 1679 թ. դեկտեմբերին Հակոբ կաթողիկոսն արդեն Կ. Պոլսում էր: Դեկտեմբերին Կ. Պոլիս հասնելու տեղեկությունը, առանց որոշ աղբյուրներ մատնանշելու, ընդունում է նաեւ Օրմանյանը⁴⁰: Իսկ Հ. Քյուրտյանը, հիմք ընդունելով Հակոբ Զուղայեցու Եղիազար Այնթափցուն ուղղված նամակը, Հակոբ կաթողիկոսի Կ. Պոլիս մուտքը համարում է 1679 թ. հոկտեմբերի 25-ը⁴¹: Իսկ Ա. Հովհաննիսյանը, հիմնվելով Հակոբ կաթողիկոսի՝ հրապարակված նամակների վրա, հանգում է այն եզրակացության, որ կաթողիկոսը 1679 թ. հունվարին արդեն իսկ ժամանած է եղել Կ. Պոլիս⁴²: Մերօրյա պատմագիտությունը Հակոբ Կաթողիկոսի Կ. Պոլիս հասնելու թվականը համարում է 1678-ը⁴³:

Ինչպես տեսնում ենք, վերոբերյալ հիշատակությունները ժողովրդի՝ 1677 կամ 1678 թ. տեղի ունեցած լինելը փաստելու առումով արժանահավատ տեղեկություններ չեն փոխանցում, մոտ է մնում նաեւ, թե կաթողիկոսը երբ է Կ. Պոլիս հասնել: Հնարավոր չէ անտեսել ո՛չ մատենագիրների, ո՛չ էլ Իսրայել Օրու գործունեությունն առնչվող փաստաթղթերի հազորդած տեղեկությունները: Միեւնույն ժամանակ այս տեղեկություններին պետք է մոտենալ միմյանց համադրելու սկզբունքով: Հետեւաբար, քանի դեռ չկան հստակ տեղեկություններ որեւէ թվականն աներկբա ընդունելու համար, հավանական ենք համարում, որ 1677 թ., իրոք, Հակոբ կաթողիկոսը, խուսափելով խանի եւ պարտատերերի հետապնդումներից,

³⁸ Անդ:

³⁹ Զամչյանը գրում է, որ Կ. Պոլսի եւ Երուսաղեմի Հայոց պատրիարքություններում ստեղծված ներեկեղեցական խնդիրներն սկսվել էին ավելի վաղ՝ 1676-ից, իսկ կաթողիկոսի Կ. Պոլիս գնալը ներկայացնում է 1679 թ. անցքերի նկարագրության ներքո, ուստի դժվար է ասել, թե կաթողիկոսը որ դեպքի մասին լսելով է նախաձեռնել գնալ Կ. Պոլիս (տե՛ս ՄԻՔԱՅԷԼ ԶԱՄՉԵԱՆ, նշ. աշխ., էջ 716–718):

⁴⁰ Տե՛ս ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3028:

⁴¹ Տե՛ս Յ. ՔԻՐՈՏԵԱՆ, Իսրայել Օրի. պատմաքննական ուսումնասիրություն, Վենետիկ, 1960, էջ 16, 18:

⁴² Տե՛ս Ա. ՀՈՎՀԱՆՆԻՍՅԱՆ, Դրվագներ..., էջ 217:

⁴³ Վալտեր Դիլոյանը եւ Պետրոս Հովհաննիսյանը Հակոբ կաթողիկոսի Կ. Պոլիս ժամանելու թվականը համարում են 1678-ը (տե՛ս Հայոց պատմություն..., էջ 17 եւ Պ. ՀՈՎՀԱՆՆԻՍՅԱՆ, Պատմագիտական ուսումնասիրություններ..., էջ 30):

կարճ ժամանակով մեկնել է Վրաստան, որտեղ գուցե տեսնելով վրացիների ազատագրության ուղղությամբ դրսևորվող նկրտումները, ինչպես նաև հանդիպելով խոչընդոտների՝ վերադարձել է եւ նախապատրաստական աշխատանքներ իրականացնելուց հետո՝ 1678 թ., Ս. էջմիածնում հրավիրել գաղտնի ժողով: Այլապես չի հիմնավորվում Ա. Հովհաննիսյանի այն տեսակետը, ըստ որի՝ կաթողիկոսը շուրջ երկուսուկես տարի դեգերել է Վրաստանում⁴⁴:

Ժողովի մասնակիցները եւ բանագնացները

Մաղաքիա Օրմանյանը Ս. էջմիածնում տեղի ունեցածը ժողով չի համարում. «....հնար չէ այդ գումարումը ժողով կոչել այն իմաստով, որով կիմանանք մենք ազգային ժողովները»⁴⁵: Անշուշտ, եթե Օրմանյան սրբազանը նկատի ունի ժողովի մասնակիցների քանակը, ապա, ըստ Խարայել Օրոն՝ Պարսկաստանից Մոսկվա կատարած ճամփորդության 29 հուլիսի 1701 թվակիր բացատրագրի հաղորդած տեղեկությունների, ժողովականների քանակը եղել է 12⁴⁶: Սակայն Օրմանյան Սրբազանը մեկ այլ առիթով գրում է. «Հարկաւ այդ միջոցին մէջ իրեն մօտեցան Հայաստան գտնուող տարբեր միաբանութիւններէ աբեղաները, հարկաւ Յակոբ տեսակցեցաւ եւ խորհրդակցեցաւ բանիմաց եւ բարեմիտ Հայերու հետ, եւ այդ ճիգերու հետեւանքը պէտք է ըլլայ այն յատուկ խորհրդակցութիւնը զոր կազմեց 1678-ին (ԼէՕ. Ա. 239)»⁴⁷: Այսինքն՝ ստացվում է, որ բուն ժողովին նախորդել է խորհրդակցությունների մի մեծ շղթա:

Մենք արդեն նշեցինք, որ շուրջ երկու տասնամյակ Հակոբ կաթողիկոսն աշալուրջ հետեւում էր զարգացող իրադարձություններին, իր՝ Թուրքիա եւ Պարսկաստան կատարած ճամփորդությունների ընթացքում հետազոտել եւ ուսումնասիրել էր հայ ժողովրդի սեփական ուժերով ազատագրվելու հնարավորությունները, ստեղծել էր օտար միջավայրում դիվանագիտական բարենպաստ հող, այսինքն՝ ամբողջ նախապատրաստական աշխատանքն ավարտված էր: Այդ շրջանում նաև խնդիրներ էին առաջացել Թուրքիայի եւ Պարսկաստանի ներքաղաքական կյանքում, աստիճանաբար օտարի լուծը թոթափելու ազատության դրոշ էին

⁴⁴ Տէս Ա. Հովհաննիսյան, Դրվագներ..., էջ 217:

⁴⁵ ՄԱՂԱՔԻԱ ԱՐՔ. ՕՐՄԱՆՅԱՆ, նշ. աշխ., էջ 3027:

⁴⁶ Տէս Դ. Ա. ՅՅՕԲ, նշ. աշխ., էջ 92:

⁴⁷ ՄԱՂԱՔԻԱ ԱՐՔ. ՕՐՄԱՆՅԱՆ, նշ. աշխ., էջ 3026:

բարձրացնում հարեւան Վրաստանը⁴⁸, հույները եւ ասորիները⁴⁹, իսկ Եւրոպայում ի հայտ էին գալիս հզորացող նոր պետություններ: Քանի որ իր նախորդ ճամփորդությունների ընթացքում հարցն արդեն լայնորեն շոշափվել էր հայության տարբեր շահագրգիռ եւ կարող ուժերի հետ, ուստի այժմ Արեւելյան Հայաստանի նշանավոր եկեղեցական եւ աշխարհական գործիչների հետ առանձին-առանձին վերլուծելով այն, հավանաբար կասկածների տեղիք չտալու համար, Ս. Էջմիածնում նպատակահարմար է եղել պարզապես առավել նշանավոր եկեղեցական եւ աշխարհական գործիչներով մեկտեղվել՝ իրականում ոչ թե որոշում կայացնելու, այլ քննարկելու բանագնացության հետ կապված կազմակերպչական մի շարք հարցեր⁵⁰: Մենք պնդում ենք, որ այդչափ կարեւոր խնդիրները, ինչպիսին են Հայաստանի ազատագրությունը եւ նման կարեւոր առաքելություն իրականացնող բանագնացության գլուխ կանգնած կաթողիկոսի հանգամանքը, ապացուցում են, որ մինչ այդ գաղտնի, սակայն առանձնաբար քննարկվել են ընդհանուր ռազմավարական հարցեր⁵¹:

Ուստի հայ ազատագրական պայքարի այս փուլի եւ Հակոբ կաթողիկոսի գործունեության լուսաբանության տեսանկյունից կարեւոր ենք համարում գաղտնի ժողովի մասնակիցներին եւ բանագնացներին անդրադառնալը: Ինչպես նշեցինք, կարծում ենք, որ Հակոբ կաթողիկոսը

⁴⁸ Տե՛ս Ա. ՀՈՎՀԱՆՆԻՍՅԱՆ, Դրվագներ..., էջ 202. Ա. ՎԻՐԱՅԱՆ, Վրաստանի XVII դ. պատմության հարցերը Զաքարիա Փանաքեռցու «Պատմագրության» համատեքստում, «Լրաբեր հասարակական գիտությունների», 2012, թիվ 1, էջ 60–61. Հ. ԱՆԱՍՅԱՆ, XVII դարի ազատագրական շարժումներն Արեւմտյան Հայաստանում, Երեւան, 1962, էջ 161:

⁴⁹ Տե՛ս Հ. ԱՆԱՍՅԱՆ, նշ. աշխ., էջ 94–106:

⁵⁰ Տե՛ս Ա. ՀՈՎՀԱՆՆԻՍՅԱՆ, Զաքարիա Ազուլեցին ..., էջ 101:

⁵¹ Հայ Եկեղեցու պատմությանն անձանոթ չէ այն գործելաոճը, որ երբ ժողովի հրավիրյալը չի կարողանում անձամբ ներկա գտնվել, ապա կամ գրով է համաձայնություն տալիս, կամ իր ներկայացուցչին է ուղարկում: Օրինակ՝ 1441 թ. Հայրապետական Աթոռը Սաից Ս. Էջմիածնում վերահաստատելու առիթով հրավիրված ժողովից բացակա մասնակիցների առիթով Թովմա Մեծոփեցին գրում է. «Եւ ի հեռաւոր վարդապետաց եւ եպիսկոպոսաց թղթով միաբանեալ ընդ մեզ», ինչից հետո թվարկում է մեկ տասնյակից ավելի վարդապետների եւ եպիսկոպոսների անուններ, որոնք գրով տվել են իրենց համաձայնությունը ժողովի կայացրած որոշմանը (տե՛ս ԹՈՎՄԱ ՄԵՏՈՓԵՑԻ, Յիշատակարան, հրատ. պատրաստ. Տ. Արարատ քնյ. Պօղոսեան, Ս. Էջմիածին, 2017, էջ 42, 44): Ուստի հավանական է, որ նման գործելաոճ է որդեգրել նաեւ Հակոբ Զուղայեցի կաթողիկոսը՝ ժողովից առաջ առանձնաբար խորհրդակցելով նշանավոր եկեղեցական եւ աշխարհիկ գործիչների հետ: Մեր այս կարծիքն ամրապնդվում է, երբ հիշում ենք, որ Հակոբ Զուղայեցի կաթողիկոսն արդեն իսկ ուներ նման փորձառություն. մասնավորապես երբ 1665 թ. ճամփորդությունից առաջ Ս. Էջմիածնում էին մեկտեղվել ժամանակի նշանավոր եկեղեցական եւ աշխարհիկ գործիչները (տե՛ս Տ. ԱՐԱՐԱՏ ՔՆՅ. ՊՈՂՈՍՅԱՆ, Հակոբ Դ. Զուղայեցի կաթողիկոսը..., է., էջ 24–38, Լ, էջ 45–60):

1677 թ. նախաձեռնել է հերթական ճանապարհորդությունը: Աղբյուրներում այս ճանապարհորդությունը ներկայացվել է որպես Կ. Պոլսի եւ Երուսաղեմի Հայոց պատրիարքություններում ստեղծված խառնակ վիճակը «դարմանելու»⁵², մեկ այլ դեպքում՝ «միաբանութիւն սրբոյ եկեղեցւոյ»⁵³, մեկ ուրիշում՝ «ի բազում պարտատուացն»⁵⁴ «փախավ, գնաց»⁵⁵: Չմերժելով բոլոր այս երեւույթների առկայությունը՝ այնուամենայնիվ պետք է պնդել, որ Հակոբ կաթողիկոսի իրական նպատակը եւ գործունեության մյուս երեսը, հասկանալի պատճառներով, հրապարակային չեն եղել: Իրական մտադրության մասին մենք կարծիք ենք կազմում՝ համադրելով կաթողիկոսի վերջին տարիների գործունեությանը վերաբերող նյութերը:

Առաջին հերթին պետք է արձանագրել, որ 1677 թ. հունիսի 1-ից հետո Վրաստան այցելելու առթիվ թե՛ Ագուլեցին եւ թե՛ Քանաքեռցին պնդում են, որ գնացել է պարտքերը մարելու համար դրամահավաք կազմակերպելու: Ուստի, ինչպես տեղին նկատել է Քյուրտյանը, «հաւանական չէ, որ գաղտնի կատարուած նման փախուստի մը համար պատգամաւորութիւն ըլլար»⁵⁶: Անշուշտ շատ ճիշտ դիտարկում է, սակայն սա եւս մեկ ապացույց է, որ կաթողիկոսի միայնակ Վրաստան անցնելու նպատակն իրոք եղել է գումար հայթայթելը: Վստահ ենք, որ հենց Վրաստանում այդ կարճ ժամանակամիջոցում վրաց գործիչների հետ ունեցած հանդիպումների արդյունքում է միտք հղացվել, որ կաթողիկոսը վերադառնա Հայաստան, խորհրդակցի ազդեցիկ եկեղեցականների եւ աշխարհականների հետ, ապա հայ-վրացական միացյալ ուժերով նոր թափով եւ մոտեցումներով նախաձեռնվի երկու ժողովուրդների ազատագրությունը⁵⁷: Բացի այդ՝ դրամի կարիք ունեցող կաթողիկոսը, որը «փախել» էր խանի հալածանքներից եւ պարտատերերի հետապնդումներից, դժվար թե իր հետ վերցնեւ ընկերակիցներ⁵⁸, նախ՝ դա աչքի կգարներ, երկրորդ՝ շքախմբով ապրելը կապված կլինեւ ծախսերի հետ: Ուստի տրամաբանական չէ, որ դրամահավաքի նպատակով կամ գաղտնի ճամփորդող

⁵² ՄԻՔԱՅԷԼ ՉԱՄՁԵԱՆ, նշ. աշխ., էջ 718:

⁵³ Յ. ՔԻՐՈՍԵԱՆ, Յակոբ Կաթողիկոս..., էջ 49:

⁵⁴ ԶԱՔԱՐԻԱ ՔԱՆԱՔԵՌՑԻ, Պատմութիւն..., էջ 141:

⁵⁵ ԶԱՔԱՐԻԱ ԱԳՈՒԼԵՅԻ, Օրագրութիւն..., էջ 145:

⁵⁶ Յ. ՔԻՐՈՍԵԱՆ, Իսրայէլ Օրի..., էջ 12:

⁵⁷ Ա. ՀՈՎՀԱՆՆԻՍՅԱՆ, Զաքարիա Ագուլեցին ..., էջ 102:

⁵⁸ Յ. ՔԻՐՈՍԵԱՆ, Իսրայէլ Օրի..., էջ 13:

կաթողիկոսն իր հետ ընկերակիցներ ունենար: Սա եւս մեկ փաստ է՝ պնդելու, որ 1677 թ. ժողով տեղի չի ունեցել, սակայն կաթողիկոսը Վրաստան այցելել է:

Վրաստանում հավանաբար դրամական միջոցների հայթայթումից, տեղի հայուկթյան եւ հատկապես վրաց եկեղեցական եւ քաղաքական գործիչների շրջանակներում համախոհներ գտնելուց հետո Հայրապետը վերադարձավ Հայաստան, որից հետո էլ Ս. Էջմիածնում գաղտնի ժողով հրավիրեց: Ինչպես վերելում նշել ենք, այս ժողովին քննության առնվող նյութը շուրջ երկու տասնամյակ ընթանում էր Հակոբ կաթողիկոսի գործունեությանը զուգահեռ: Ստեղծված էին անհրաժեշտ բոլոր կապերը թե՛ ներքին եւ թե՛ արտաքին շահագրգիռ ուժերի շրջանակներում, ստեղծվել էր բարեպատեհ առիթ՝ հայերի ազատագրական ձգտումները զուգորդելու հարեւան վրաց ժողովրդի նույնանման ցանկությունների հետ՝ շահագրգռելով Ռուսաստանի եւ Եւրոպայի միապետերին:

Ժողովականների մասին տեղեկություններ պարունակում է Կ. Էզովի հրատարակած «Պետրոս Մեծի հարաբերությունները հայ ժողովրդի հետ» փաստաթղթերի ժողովածուն⁵⁹, հատկապես՝ Ռուսաստանի կայսրին ուղղված հայ մելիքների նամակը⁶⁰ եւ Օրու բացատրագիրը⁶¹: Առաջինի դեպքում նամակը ստորագրած մելիքները տասն են, որոնք հականե-հանվանե հիշվում են, իսկ Օրու բացատրագրում նշվում է, որ ժողովականների թիվը եղել է 12՝ առանց մասնակիցների անունների հիշատակության: Մասնակիցների քանակի վերաբերյալ երկու փաստաթղթերի այս տարբերությունը, կարծում ենք, բացատրվում է նրանով, որ Ս. Էջմիածնի եւ Անգեղակոթի ժողովների միջանկյալ հատվածում ժողովականներից երկուսը կամ մահացած են եղել, կամ չեն կարողացել մասնակցել Անգեղակոթի ժողովին: Երկու փաստաթղթում էլ նշվում է, որ ժողովականներն ընտրում են երեք հոգու եւ կաթողիկոսի գլխավորությամբ Կ. Պոլսի

⁵⁹ Այս ժողովածուի մեջ ներառված վավերագրի արժանահավատության խնդիրը քննում է նաեւ Ա. Հովհաննիսյանը, որը, համադրելով Հայգելի, Յագարելիի եւ Քարամյանի ուսումնասիրությունների արդյունքները, անում է սեփական եզրահանգումը. «Մինաս վարդապետը կարող էր մասնակցել այդ խորհրդակցություններին եւ որպէս ժողովականների մէջ միակ քիչ թէ շատ գիտակ եւ գրագէտ անձնաւորութիւն գրի առնել եւ խմբագրել մելիքների դիմումները: Զեռագրական համեմատութիւններից գիտենք արդէն, որ վերջին հանգամանքը ոչ միայն հնարաւոր է, որպէս ենթադրութիւն, այլ եւ՝ ականբեր, որպէս իրողութիւն» (տե՛ս Ա. Հովհաննիսյան, Հայ-ռուս օրինատացիայի..., էջ 29–30):

⁶⁰ Տե՛ս Դ. Ա. ՅՅՕՅ, նշ. աշխ., էջ 17:

⁶¹ Տե՛ս անդ, էջ 92:

վրայով ուղարկում Ռուսաստան: 1699 թ. մելիքների ստորագրությամբ նամակում չեն հիշատակվում բանագնաց ընտրվածների անունները, այլ ընդամենը գրվում է. «Այսմ խորհրդիւս ընտրեցաք Գ. իշխան»⁶²: Այնինչ տեսնում ենք, որ Օրին իր բացատրագրում հիշատակում է բանագնացների անունները. «Из того своего начальства выбрав отца ево Израилева, Израиля жъ, да Аганжан Аври, с третьим товарищем»⁶³: Ստացվում է, որ երեք բանագնացներից մեկը եղել է Մելիք Իսրայելը, մյուսը՝ մելիք Աղաջանը, իսկ երրորդ մասնակցի անունը չի հիշատակվում: Բանագնացների մեջ կաթողիկոսի լինելու մասին, ինչպես տեսնում ենք, մելիքների ստորագրած նամակում որեւէ խոսք չկա, այնինչ Օրու բացատրագրում բանագնացների անունները թվարկելիս մելիք Աղաջանի անվան հիշատակության ժամանակ նշում է, որ վերջինս դեռ կենդանի է, իսկ բանագնացներից իր հայրը եւ մյուսները, այդ թվում նաեւ կաթողիկոսը, մահացել են⁶⁴: Անշուշտ, բանագնացները, ինչպես նախորդները, պետք է շղարշվեին կրոնական քողով: Լավագույնը հայ կաթողիկ եկեղեցիների դավանական միության շուրջ բանակցություններն են: Ուստի բանագնացների թվում եղել են ոչ միայն մելիքները, այլեւ բարձրաստիճան հոգեւորականներ: Մեսրոպ վրդ. Թերզյանը, ուսումնասիրելով Հռոմի պապական արխիվների հրապարակումները⁶⁵, պարզում է, որ Հակոբ կաթողիկոսի՝ դեպի Հռոմ ճանապարհորդության մասին Հռոմում տեղյակ են եղել առնվազն մինչեւ 1679 թ. ապրիլի 24-ը⁶⁶: Սակայն ուշագրավ է, որ կաթողիկոսի ճամփորդակիցների մասին նշված է, որ ուղեկցողների թվում եղել են արքեպիսկոպոսներ եւ եպիսկոպոսներ⁶⁷: Քյուրտյանը հավանական չի համարում, որ կաթողիկոսը Պոլիս էր ժամանել Հռոմ գնալու համար: Նրա կարծիքով, եթե Հռոմ պետք է գնար դավանանքի շուրջ բանակցություններ վարելու, ապա այդ «կրնար թուղթով ալ ընել»⁶⁸: Անշուշտ այստեղ Քյուրտյանը մոռացության է մատնել Հակոբ կաթողիկոսի եւ Հռոմի Ալեքսանդր է. պապի միջեւ եղած գրությունները, որտեղ փոխադարձ ցանկություն էր

⁶² Г. А. ЭЗОВ, նշ. աշխ., էջ 17:

⁶³ Անդ, էջ 92:

⁶⁴ Անդ:

⁶⁵ Հայր Մեսրոպյն օգտվել է Հավատի տարածման հանձնաժողովի արխիվային անտիպ նյութերից (Archivio Sacra Congregazione de Propaganda Fide Miscellanea Tomo Xiv. Quaderno III), որոնք այս պահին մեզ անհասանելի են:

⁶⁶ ՄԵՍՐՈՊ ՎՐԴ. ԹԵՐԶԵԱՆ, Յակոբ Դ. Զուղայեցի (1655—1680), Պէլրութ, 1956, էջ 187—188:

⁶⁷ Տես անդ:

⁶⁸ Յ. ՔԻՒՐՏԵԱՆ, Նիւթեր Յակոբ Զուղայեցի..., էջ 88:

հայտնվել դեմ առ դեմ տեսնվելու եւ բանակցելու մասին⁶⁹։ Ուստի մենք հավանական ենք համարում Հակոբ կաթողիկոսի նպատակը՝ Հայաստանի ազատագրությունը կազմակերպելու համար Եւրոպա անցնելը, ավելին. Հռոմի հետ կրոնադավանաբանական հարցերի շուրջ բանակցությունը միակ պատրվակն էր, որով կաթողիկոսը կարողանում էր խույս տալ պարսկական եւ թուրքական հետապնդումներից, թեեւ վկայություններ կան, որ, այնուամենայնիվ, թուրքական եւ պարսկական իշխանությունները դեպի Կ. Պոլիս ճանապարհորդության ընթացքում դժվարություններ են ստեղծել⁷⁰։ Քյուրտյանն անվերապահ կերպով մերժում է կաթողիկոսի՝ Կ. Պոլսից Հռոմ անցնելու մասին տեսակետը՝ պատճառաբանելով, թե որեւէ հիշատակություն չկա կաթողիկոսի նամակագրության մեջ Հռոմ անցնելու մասին, իսկ Հայաստանի ազատագրության նպատակով Հռոմ գնալն էլ մերժում է՝ վկայակոչելով թուրքական իշխանությունների հսկողության ներքո դրա անհնարինությունը⁷¹։ Նրա կարծիքով՝ այդ ճամփորդությունը կրում էր բացառապես դրամահավաքության նպատակ⁷², իսկ թուրքական իշխանությունների կողմից հարուցվող արգելքները մեկնաբանում է Եղիազար Այնթափցու եւ Ոնոփրիոս Կարկուտի կողմից թուրքական իշխանություններին հրահրելով⁷³։ Սակայն այս տեսակետը, մեր կարծիքով, հիմնավոր չէ, քանի որ նկատի ունենալով Հակոբ կաթողիկոսի՝ Հռոմի Ալեքսանդր Է. պապին ուղղված գրության մեջ դեմ առ դեմ հանդիպելու ցանկությունը, ինչպես նաեւ Հակոբ կաթողիկոսի եւ Եղիազար Այնթափցու միջեւ փոխանակված գրությունները՝ հանգում ենք այն եզրակացությանը, որ երկուսի միջեւ, կարծես, կայացել էր հաշտություն, եւ ստեղծված կացությունն ստիպում էր համակերպվել, ավելին. այժմ փորձ էր արվում մի կողմ դնել առկա տարաձայնությունները՝ առավել վեհ գաղափար կյանքի կոչելու համար։ Ուստի հավանական

⁶⁹ Թեեւ տարիներ անց Հ. Քյուրտյանը, հակասելով ինքն իրեն, իր մեկ այլ ուսումնասիրության մեջ գրում է. «...այդ զրպարտությունները, որոնց հիմը եղաւ Յակոբ Զուղայեցիի Աղէքսանդր Պապին ուղղած նամակին մէջ սովորական, անմեղ եւ քաղաքավարական արտայայտութիւնը՝ ցանկանալ Պապը անձամբ տեսնելու» (տե՛ս Յ. ՔԻՒՐՏԵԱՆ, Յակոբ Կաթողիկոս..., էջ 39)։

⁷⁰ Հ. Քյուրտյանը զարմանք է արտահայտում, թե ինչու ո՛չ Զաքարիա Քանաքեռցին, ո՛չ Զաքարիա Ազուլեցին եւ ո՛չ էլ Երեմիա Քյոմուրճյանը չեն հիշատակում Հակոբ կաթողիկոսի Կարինի փաշայի կողմից ձերբակալվելու մասին (տե՛ս Յ. ՔԻՒՐՏԵԱՆ, Իսրայէլ Օրի..., էջ 16)։

⁷¹ Տե՛ս Յ. ՔԻՒՐՏԵԱՆ, Նիւթեր Յակոբ Զուղայեցի կաթողիկոսի..., էջ 88։

⁷² Տե՛ս Յ. ՔԻՒՐՏԵԱՆ, Իսրայէլ Օրի..., էջ 14։

⁷³ Տե՛ս անդ։

ենք համարում, որ կաթողիկոսը ծրագրել էր, նպաստավոր պայմաններ ստեղծվելուն պես, Կ. Պոլսից անցնել Հռոմ:

Կոստանդնուպոլսյան բանագնացությունը

Նկատի ունենալով Հակոբ կաթողիկոսի՝ Եղիազարին ուղղված նամակի բովանդակությունը, ի վերջո, պատվիրակությունը Ս. Էջմիածին—Թիֆլիս—Կարին⁷⁴—Տիգրանակերտ — Կ. Պոլիս ուղղությամբ⁷⁵ 1679 թ. դեկտեմբերին⁷⁶ հասնում է Կ. Պոլիս:

Օրմանյան սրբազանը ցավ է հայտնում, որ Հակոբ կաթողիկոսի՝ Կ. Պոլսում եղած գործունեության մասին տեղեկությունները սակավ են, իսկ եթե «կանոնաւոր տեղեկութիւններ գրուած ըլլային», ապա կաթողիկոսի Կ. Պոլսում եղած օրերի գործունեությունը «հետաքրքրական պէտք է ըլլային»⁷⁷:

Բնականաբար Հակոբ կաթողիկոսի երկրորդ այցելությունը Կ. Պոլիս ուներ էլ գաղտնի ու հեռահար, էլ արտաքո կարգի նպատակներ: Գաղտնի էլ հեռահար նպատակը հայ ազատագրական պայքարի կազմակերպման համար դիվանագիտական հող պատրաստելն էր եւ գործնական քայլերի դիմելը, իսկ հաշս պարսկական եւ թուրքական իշխանությունների՝ ներեկեղեցական խնդիրները կարգավորելը: Այս ամենն իրագործելու համար, անշուշտ, նրան հարկավոր էին գործակիցներ, համախոհներ եւ գաղափարակիցներ: Օրմանյան սրբազանը կարծում է, որ Կ. Պոլսում Հակոբ կաթողիկոսի գործակից-գաղափարակիցն այդ օրերին Պոլսում մեծ հեղինակություն ունեցող Մարտիրոս Կաֆացին էր⁷⁸, իսկ որպես խորհրդական նա համարում էր Երեմիա Չելեպի Քյոմուրճյանին, որին նա ընդունում է «իբրեւ հմուտ եւ ուսումնական, իբրեւ գործիչ եւ խոհական անձնավորութիւն»⁷⁹:

⁷⁴ Քյուրտյանի վերականգնած ժամանակագրության համաձայն՝ Հակոբ կաթողիկոսը 1678 թ. սեպտեմբերի 28-ին արդեն իսկ եղել է Կարինում, իսկ թե երբ է ժամանել, տեղեկություններ չեն պահպանվել (տե՛ս Յ. ՔԻՐՏՅԱՆ, Յակոբ Կաթողիկոս..., էջ 55):

⁷⁵ Քյուրտյանը վկայակոչում է կաթողիկոսի նամակը, որտեղ հիշատակվում է՝ իբրեւ թե կաթողիկոսը նախապես ցանկացել է Սեւ ծովով Ղրիմ անցնել, այնտեղից էլ՝ Եւրոպա, սակայն չի կարողացել խմբապետ Քոնկված ապստամբության պատճառով, եւ որոշել է Տրապիզոնով անցնել Եւրոպա, սակայն Սպերում Կարինի փաշայի կողմից ձերբակալվել է (տե՛ս Յ. ՔԻՐՏՅԱՆ, Իսրայէլ Օրի..., էջ 15–17):

⁷⁶ ՏԵՍ ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3030:

⁷⁷ Անդ, էջ 3028:

⁷⁸ ՏԵՍ անդ:

⁷⁹ Անդ, էջ 3029:

Անշուշտ երկու անուններն էլ՝ մեկը եկեղեցականաց, մյուսը՝ աշխարհականաց մեջ մեծ հեղինակություն էին վայելում, սակայն երկուսից առավել կարեւորում ենք Հակոբ կաթողիկոսի կապը Քյոմուրճյանի հետ, քանի որ վերջինս «բազմակողմանի կապեր ունեւ որ միայն հայկական միջավայրում, այլեւ առնչվում էր օսմանյան մտավոր եւ քաղաքական շրջանակների, Կ. Պոլսում դիվանագիտական առաքելությամբ հանդես եկող եւրոպացիների հետ»⁸⁰: Եթե իրապես Քյոմուրճյանը կաթողիկոսի հետ ունեցել է մտերիմ⁸¹ հարաբերություններ, ապա վստահաբար նրա ունեցած կապերն ու հնարավորությունները կարող էին օգտագործվել ի շահ հայ ազատագրական պայքարի: Մենք եւս համակարծիք ենք այն տեսակետին, որ Երեմիա Չելեպի Քյոմուրճյանն իր մարդկային նկարագրով եղել է հակասական⁸²: Այնուամենայնիվ, կարծում ենք, որ ազգային հարցերի վերաբերյալ առաջնորդվել է ոչ նեղ անձնական կամ «կուսակցական» շահերով, այլ ընդհանուր ազգի շահերով: Մեր կարծիքն ամրապնդվում է, երբ որոշ փաստեր համադրում ենք, օրինակ՝ ժամանակին, երբ Եղիազար Այնթափցին միտք հղացավ Օսմանյան կայսրության տարածքում նոր կաթողիկոսություն հիմնել⁸³, ազգային շրջանակներում հենց Քյոմուրճյանին որպես բանազնաց

⁸⁰ Գ. ԱՅՎԱԶՅԱՆ, Երեմիա Չելեպի Քյոմուրճյանի «Օրագրություն» երկը, Հայոց պատմության հարցեր (գիտական հոդվածների ժողովածու), թիվ 15, Երեւան, 2014, էջ 97:

⁸¹ Գայանե Այվազյանը, հակադրվելով մի շարք ուսումնասիրողների (Մաղաբիա արք. Օրմանյան, Ա. Հովհաննիսյան, Հ. Վրդ. Պատիկյան) կարծիքներին, իր «Երեմիա Չելեպի Քյոմուրճյանի կյանքը» հոդվածում հանգում է այն եզրակացության, որ «ուսումնասիրողները փորձել են սեպ խրել Երեմիա Քյոմուրճյան—Եղիազար Այնթափցի մերձակցության արանքում՝ շատ դեպքերում ձգտելով Երեմիային շողկապել Հայոց Եկեղեցու կենտրոնական իշխանությանը՝ ի դեմս կաթողիկոս Հակոբ Գ. Զուղայեցու: Սկսած 1660-ական թթ. վերջից՝ Երեմիա Քյոմուրճյանը դադարում է իր ժամանակի անցքերը շարադրել նախկին մանրաստուգությամբ, ուստի չենք կարող որոշակի ասել, թե ինչ ընթացք ունեցան նրա եւ Եղիազար Այնթափցու հարաբերությունները: Վերջին վկայությունները վերաբերում են գլխավորապես Եղիազարի կաթողիկոսության շրջանին, երբ նրան ուղղված իր նամակներում Երեմիան, հնարավոր է, որոշակի դադարից հետո նորից իր հիացմունքն ու համակրանքն է հայտնում նշանավոր այս գործչի նկատմամբ (տես Գ. ԱՅՎԱԶՅԱՆ, Երեմիա Չելեպի Քյոմուրճյանի կյանքը, «Պատմություն եւ մշակույթ» հայագիտական հանդես, ԵՊՀ, Երեւան, 2014, էջ 182—183):

⁸² Գ. ԱՅՎԱԶՅԱՆ, ԻՉ. աշխ., էջ 181:

⁸³ 1664 թ. հոկտեմբերին, օսմանյան իշխանությունների թուլլովությամբ, Հալեպի Ս. Քառասնից Մանկանց եկեղեցում, Սսի Խաչատուր Գաղատացի կաթողիկոսի ձեռամբ, Եղիազար Այնթափցին օծվում է Ամենայն Հայոց Կաթողիկոսությունից անկախ թուրքահայոց հակաթու կաթողիկոս (տես Ա. ՈՒԹՈՒՋՅԱՆ, Եղիազար Ա. Այնթափցի, Ամենայն Հայոց Կաթողիկոսներ, Հայ Եկեղեցու հանրագիտարան, պրակ Ա., Ս. Էջմիածին, 2008, էջ 79, ինչպես նաեւ ԱՐՄԵՆ ՍՐԿ. ԳՐԻԳՈՐՅԱՆ, Եղիազար Այնթափցին եւ թուրքահայոց կաթողիկոսության հիմնադրման հիմնահարցը, մագիստրոսական թեզ, ԳՀՃ, Ս. Էջմիածին, 2013, էջ 48—58 (անտիպ): Մերօրյա պատմագրությունը Եղիազար Այնթափցու հակաթու կաթողիկոսության հիմնադրումը որակում է որպես պառակտողական, որը ջլատում էր առանց այն էլ

ուղարկեցին Այնթափցու մոտ՝ համոզելու հետ կանգնել այդ պառակտիչ գաղափարից, որը նա հոժարությամբ ստանձնեց եւ նույնիսկ դրա հետեւանքով որոշակի դժվարությունների առաջ կանգնեց⁸⁴։ Իսկ այս փուլում տեսնում ենք, որ Քյոմուրճյանն ստանձնում է կարեւոր դեր՝ օգնելու Հակոբ կաթողիկոսին հաստատել դիվանագիտական կապեր եւ ազգային շրջանակներում հող նախապատրաստել հայ ազատագրական պայքարը լավագույնս կազմակերպելու համար։ Օրմանյանի կարծիքով՝ կաթողիկոսն այս ամենի համար «հարմարագույն խորհրդական մը չէր կրնար գտնել»⁸⁵։ Ավելին, նա կարծում է, որ հենց Քյոմուրճյանի խորհրդով է Հակոբ կաթողիկոսը Եղիազար Այնթափցուն Երուսաղեմից նամակով հրավիրել Կ. Պոլիս, որպեսզի միասին «խորհուրդ արարեալ գտցուք եւս հնարից յօգուտ ազգին»⁸⁶։ Շուտով Մարտիրոս Ղրիմեցին, որը նախկինում Եղիազար Այնթափցու հակառակորդն էր, կաթողիկոսի կարգադրությամբ, որպես բանագնաց, մեկնեց Երուսաղեմ⁸⁷։ Յավոք, ժամանակահատվածի ոչ բարենպաստ լինելու պատճառով Այնթափցին չկարողացավ անմիջապես թողնել Երուսաղեմը եւ մեկնել Պոլիս՝ գրավոր կերպով խոստանալով Մեծ պահլի եւ Զատիկի ուխտավորության օրերից հետո գալ Պոլիս՝ հանդիպելու Հակոբի կաթողիկոսի հետ։ Այս չկայացած համագործակցությունը միտված էր համախմբելու եկեղեցական շրջանակները եւ հաշտեցնելու նախկին հակառակորդներին, որը թույլ կտար, համախմբված մի գաղափարի շուրջ, փնտրելու հայ ազատագրական լավագույն ուղիները։ Ինչեւէ, Հակոբ կաթողիկոսը չէր կարող, առանց որեւէ նախաձեռնողականություն ցուցաբերելու, սպասել, թե երբ կժամանի Այնթափցին։ Ուստի նա այս ժամանակահատվածում փորձեց կապեր հաստատել արեւմտյան գործիչների հետ։ Մասնավորապես Հակոբ կաթողիկոսին վերագրվող դիվանագրում հիշատակվում են պապական իշխանության երկու գործիչների՝ Կյուղիկոնի պապական փոխանորդ

երկփեղկված հայության ուժերը։ Այս ամենը հայության կյանքում խոր հետք չթողեց՝ շնորհիվ Հակոբ կաթողիկոսի եւ նրա համախոհ հայրենասեր գործիչների լայնախոհ եւ խոհեմ ներկեղեցական քաղաքականության (տե՛ս Հ. ՄԻՐՋՈՅԱՆ, Արդյո՞ք եղել են հակահակոբյան ժողովներ (հնատիպ սկզբնաղբյուրների քննական վերլուծություն), «Բանբեր Երեւանի համալսարանի», 138.1, Երեւան, 2012. ԱՐՄԵՆ ՍՐԿ. ԳՐԻԳՈՐՅԱՆ, Եղիազար Այնթափցին եւ թուրքահայոց կաթողիկոսության հիմնադրման հիմնահարցը, մագիստրոսական թեզ, ԳՀՃ, Ս. Էջմիածին, 2013 (անտիպ)։

⁸⁴ Տե՛ս Գ. ԱՅՎԱԶՅԱՆ, նշ. աշխ., էջ 182։

⁸⁵ ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3029։

⁸⁶ Անդ. ՄԻՔԱՅԷԼ ԶԱՄԶԵԱՆ, նշ. աշխ., էջ 718։

⁸⁷ Տե՛ս ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3030։

Գասպար արքեպիսկոպոս Գասպարինի եւ Հիսուսյան միաբանության մեծավոր Ֆրանկիոս Զիլի հետ ունեցած կապերը⁸⁸։ Վերջիններիս հետ բանակցությունները, ըստ Օրմանյանի, անցել են անարդյունք⁸⁹։ Սակայն Օրմանյանը նաեւ համաձայն չէ Լեոյի միակողմանի այն կարծիքին⁹⁰, որ բանակցությունների ձախողման պատճառը եղել է Հակոբ կաթողիկոսի առաջադրած ազատագրության ծրագիրը հոգեւորականների կողմից չընդունվելը⁹¹։ Մենք եւս համակարծիք չենք Լեոյի սույն տեսակետին. Հայաստանի ազատագրությունը կազմակերպելը, բնականաբար, յուրաքանչյուր գործիչ պատկերացրել է յուրովի, ուստի հոգեւորականները ոչ թե դեմ են եղել Հակոբ կաթողիկոսի՝ Հայաստանն ազատագրելու ծրագրին, այլ մտահոգությունը եղել է հակառակվելը սին խոստումների դիմաց հնարավոր դավանական զիջումներին։ Այն, որ Հակոբ կաթողիկոսն իրապես եղել է հայ ազատագրական պայքարի նախաձեռնողն ու իրականացնողը, երեւում է նրա հակառակորդների պարսկական եւ թուրքական իշխանություններին ուղղված «ամբաստագրերից»⁹², իսկ այն պնդումը, թե այդ դեպքում ինչպես է խուսափել պարսկական եւ թուրքական հետապնդումներից, նույնպես հերքվում է, քանի որ Հակոբ կաթողիկոսին թե՛ հետապնդել են եւ թե՛ նույնիսկ որոշակի ժամանակ բանտարկել⁹³։ Պարզապես ներեկեղեցական փոթորկվող կյանքը «լավագույն» առիթ է եղել, որպեսզի Հակոբ կաթողիկոսը Հայաստանի ազատագրության նպատակով ծավալած իր գործունեությունը եւ դրա հետ առնչվող նամակագրություններն ու ճամփորդությունները

⁸⁸ *Տէս անդ (հմմտ. [Stephanum Azarian], Ecclesiae Armenae Traditio de Romani Pontificis Primatu Iurisdictionis Et Inerrabili Magisterio, 1870, էջ 127. ԱՂԵՔՍԱՆԴՐ ՎՐԴ. ՊԱԼՃԵԱՆ, Պատմութիւն կաթողիկէ վարդապետութեան ի հայս եւ միութեան նոցա ընդ հռոմէական եկեղեցւոյ ի Փլորենտեան սինհոդոսի, Վիէննա, 1878, 164:*

⁸⁹ *Տէս ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3031:*

⁹⁰ Իմիջիայլոց՝ այս կարծիքի ջատագովներից է նաեւ Քյուրտյանը, ըստ որի՝ «Յակոբ Զուղայեցիի վերագրուած է հայկական ազատագրական շարժման մը ղեկավարութիւնը, որու հիմը կրնան ըլլալ Ռնոփրիոս Կարկուտի եւ Սահակ Ղըլըմպիկի շարախօսութիւնները, հեշտութեամբ մատնութեան հաւասար, որոնցմով անոնք ջանացին հարուածել Յակոբ Զուղայեցիին» (տե՛ս Յ. ՔԻՐՏԵԱՆ, Յակոբ Կաթողիկոս..., էջ 39):

⁹¹ *Տէս ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3031, ԼԷՕ, Հայկական տպագրութիւն. մեր կեանքը, գրականութիւնը անցեալում, հտ. Ա, XVI–XVII դար, Թիֆլիս, 1901, էջ 243:*

⁹² Յ. ՔԻՐՏԵԱՆ, Յակոբ Կաթողիկոս..., էջ 17, 23

⁹³ 1680 թ. Եղիազար Այնթափցուն գրած նամակում Հակոբ կաթողիկոսը ներկայացնում է ճանապարհորդության ընթացքում իր կրած դժվարությունները (տե՛ս Յ. ՔԻՐՏԵԱՆ, Յակոբ Կաթողիկոս..., էջ 40): Կաթողիկոսի կրած դժվարությունների մասին է վկայում նաեւ նրան վերագրվող, 1679-ով թվագրվող, մեկ այլ գրություն (տե՛ս Յ. ՔԻՐՏԵԱՆ, Յակոբ Կաթողիկոս..., էջ 43–45):

քողարկի միջեկեղեցական եւ ներեկեղեցական խնդիրները հարթելու կամ գոյացած պարտքերը հատուցելու համար դրամ հավաքելու պատրվակներով: Այս տեսանկյունից ուշագրավ է Մաղաքիա Օրմանյանի տեսակետը, ըստ որի՝ աներկբա է Հակոբ կաթողիկոսի՝ Արեւմուտք, ի մասնավորի Հռոմ գնալու նպատակադրումը: Ուստի Օրմանյանը, թվարկելով կաթողիկոսի՝ Հռոմ չգնալու պատճառները, այնուամենայնիվ փաստում է, որ Հակոբ կաթողիկոսին չհաջողվեց Պոլսից այն կողմ անցնել⁹⁴: Վերջինս մայիսի 30-ին հիվանդանում եւ անկողին է ընկնում՝ չկարողանալով իրականացնել նպատակադրած ուղևորությունը: Շուտով, կորցնելով գործելու ունակությունը, օգոստոսի 1-ին կնքում է մահկանացուն⁹⁵:

Փաստորեն, թեեւ Հակոբ Զուղայեցու նախաձեռնած՝ Հայաստանի ազատագրության ծրագիրը մնաց անավարտ եւ առ ժամանակ հետաձգվեց, իսկ բանակցություններին վերաբերող փաստաթղթերը ցիրուցան եղան, այնուամենայնիվ հայ ազատագրական պայքարի կազմակերպման եւ արտաքին եւ ներքին ուժերի համախմբման եւ հատկապես արտաքին կողմորոշման համար Հակոբ կաթողիկոսի անվհատ՝ շուրջ երկու տասնամյակ ձգվող պայքարը տվեց իր դրական արդյունքները⁹⁶:

Այսպես՝ կարող ենք արձանագրել, որ Ժէ. դարի երկրորդ կեսին առաջացած ազգային-ազատագրական նոր գաղափարախոսություն հիմքում ընկած է հայ ազատագրական պայքարի ուղղությամբ իրականացված Հակոբ Դ. Զուղայեցի կաթողիկոսի գործունեությունը⁹⁷:

РЕЗЮМЕ

В годы предводительства Католикоса Акопа IV Джугаеци (1655—1680), по его непосредственной инициативе, в работах, осуществленных в направлении освободительной борьбы, важна роль освещения тайного собрания 1677/1678 в Эчмиадзине и ряда связанных с ним вопросов. Указанное собрание сыграло

⁹⁴ Տէս ՄԱՂԱՔԻԱ ԱՐՔ. ՕՐՄԱՆԵԱՆ, նշ. աշխ., էջ 3032:

⁹⁵ Հակոբ Դ. Զուղայեցի կաթողիկոսի մահվան օրվա հանգամանքների վերաբերյալ մանրամասն տես Ա. ՈՒԹՈՒՋՅԱՆ, Ամենայն Հայոց Կաթողիկոս Հակոբ Զուղայեցու մահվան օրվա առեղծվածի շուրջ, «Էջմիածին», 2013, Լ., էջ 86—91:

⁹⁶ Հայ պատմագրիտական միտքն այսօր Իսրայել Օրու գործունեությունը բնորոշում է որպես Հակոբ կաթողիկոսի գործի շարունակություն (տես Ա. ՀՈՎՀԱՆՆԻՍՅԱՆ, Իսրայել Օրին..., էջ 149), թեեւ կան նաեւ հակառակ կարծիք ունեցողներ (տես Յ. ՔԻՐՐՏԵԱՆ, Իսրայել Օրի..., էջ 18):

⁹⁷ Հայոց պատմություն..., էջ 17:

ключевую роль в формировании идеологической ориентации армянской освободительной борьбы, а также подготовило практическую почву для разработки и осуществления последующими деятелями наиболее реалистичных программ.

Несмотря на то, что инициированная Акопом Джугаеци программа освобождения Армении, к сожалению, осталась незавершенной и была отложена, а документы, касающиеся переговоров, были разбросаны, непрестанная борьба Католикоса Акопа Четвертого, направленная на организацию армянской освободительной борьбы и сплочение внешних и внутренних сил, имеющая внешнюю ориентацию, дала свои положительные результаты.

SUMMARY

Coverage of the secret meeting of Holy Etchmiadzin held in 1677/1678 and of a number of issues related to it, is important for the work carried out in the direction of the liberation struggle during the Pontificate of Catholicos Hakob IV of Julfa (1655—1680) upon his direct initiative. The mentioned meeting played a key role in the ideological orientation of the Armenian liberation struggle, as well as prepared a practical ground for the elaboration of more realistic programs and actions of coming figures.

Unfortunately, the program for the liberation of Armenia initiated by Hakob of Julfa remained unfinished, was postponed for some time, and the documents related to the negotiations were scattered; however, the two-decade-long tireless efforts of Catholicos Hakob for the organization of the Armenian liberation struggle, for the consolidation of external and internal forces, and especially for the orientation on external issues gave positive results.

